



16. oktobari - 2024

UKA2024/126

Pisortat namminersortullu suliffeqarfiini sulilerlaat tamarmik sullivimmi isumannaallisaanermik ilinniagaqarsimanissaasa inatsisitigut piumasaqaataalernerata aningaasatigut allaffissornikkullu kingunerisassaasa ersersinneqarnissaat siunertaralugu nassuiaasiornissamik Naalackersuisut peqquneqarnissaannik Inatsisartut aalajangiiffigisassaattut siunnersuut. Nassuiaat UKA 2025 nallertinnagu Inatsisartunut agguanneqassaaq.

(Inatsisartunut ilaasortaq Anna Wangenheim, Demokraatit)

Siullermik Siumumiik Anna Wangenheim, Demokraatit siunnersuutaanut qutsavingerusupparput. Suliffeqarfimmi isumannaallisaaneq, taassumallu iluani periutsit Siumumiik pingaarutilittut soorunami isigivagut.

Siunnersuutigineqarpoq inatsisitigut namminersortuni, pisortanilu sulilerlaat tamarmik isumannaallisaanermik ilinniangaqartalissasut. Naak tamanna siunertamigut pitsaasuungaluartoq, tassami suliffik isumannaatsoq aammalu sulisut toqqissisimallutik suliffigisinnaasat pingaartuteqaraluartoq, piumasaqaat Siumumiik annertuallaarsoraarput.

Siumumiik sulisartut pingaartilluinnarpagut, nunatsinnimi nappatitta pingaartut ilagimmatigit. Taamaattorli nakkutilliisoqarfimmut, suliffinnullu annertuallaamik, immaqalu inatsisitigut inorseeratarsinnaasumik aaqqiinissaq, misissuinissarlu orniginartingilarput.

Taamaakkaluartoq siunnersuutip oqallisigineqarnissaa pingaaruteqarpoq. Taamaattumik Siumumiik takusinnaavarput siunnersuut siunertaqarluartoq, taamaattumillu assigiinngittunik pitsanngorsaataasinnaasunik qaqitsilaassaagut.

Siumumiik oqaatingeqqaalaassuarput Naalackersuisut allannguutissatut siunnersuutaat isumaqatingaarput, taamatut isumasioqatigiinnermi, nalunaarusiunngikkaluarluni sulisitsisut, sulisartut, nakkutilliisoqarfik, allallu soqutigisaqatigiit imminnut paaseqatigiillutik, tingussaasunik, imminut artukkiinngittunik aaqqiissutissanik ujartuisinnaassapput.

Siumimiillu assigiinngittunik siunnersuutissaqarpugut, isumasioqatigiinnermi atorneqarsinnaasunik. Nalunngilarpummi, suliffeqarfiit ilaat, soorlu aalisarnerup iluani, sillimaniarnikkut annerusumik sillimaniarnikkut, peqqissutsikkut aammalu avatagiisinut piumasaqaateqarsinnaasartut. Minnerunngittumillu sulisut pisinnaatitaaffimminnik ilisimaarinnissat, tassami arlaatigut ajutuussangaluarunik nalunngittariaqarpaat qanoq imminnut sulisartut illersorsinnaassallutik.



Inatsisitigut kipparippallaanik piunasaqaateqanngikkaluarluta, makkunannga allaanerulaanik siunnersuuteqarusuppugut, isumasioqatigiinnermi eqqartorneqarsinnaasutut:

- Digital- imik suliffeqarfimmi isumannaallisaanermik “ilinniarfik” paasissutissanik tunngaviusunik ilisimatitsisinnaasoq.
- Nittarsaassinikkut, allatigullu sulisartut aammalu suliffeqarfiit eqqorneqarnerusartut paasissutissiiffiginerisigut. Kampagne- nik taallugit.
- Ajunngittorsiassat suliffeqarfinnut, soorlu akileraartarnermi ilanngaatisigut, tassa suliffeqarfiup isumannaallisaanermut aningaasat atukkani ilanngaatigisinnaagunigit, tamanut pitsaasumik angusaqarsinnaassammat.
- Ilinniarfiit assigiinngittut suleqatingalugit, ilinniartitaanermi naammattusaakkamik isumannaallisaanermut ilinniartitsisarnissaq.

Siumumiik siunnersuutigut atorluarneqarsinnaagunik, suliffeqarfimmi aammalu sulisunut isumannaallisaaneq pitsanngorsaavigneqarsinnaavoq. Inatsisartutummi, naak akisussaafik suli tigunikuunngikkaluaripput, akisussaaqataavugut. Siumumiillu sulisartut, suliffeqarfiillu isumannaatsuunissaat pingaartikkatsigu, naak, siunnersuuteqartoq itingartikkaluarlugu assigiinngittunik siunnersuuteqarpugut.

Siumumiik taamatut oqaaseqarluta Naalakkersuisut allannguutissatut siunnersuutaat taperserparput, neriulluta sulinerminni oqallinnermi innersuutigut atorluarumaraat.

Qujanaq.

Kuno Fencker, Siumut